

Hekalu Takatifu la Mwili

Au hamjui ya kuwa mwili wenu ni hekalu la Roho Mtakatifu aliye ndani yenu, mliyepewa na Mungu? Wala ninyi si mali yenu wenyewe; maana mlinunuliwa kwa thamani. Sasa basi, mtukuzeni Mungu katika miili yenu

—1 Wakorintho 6:19, 20.

Ule ukamilifu wa tabia ambao Bwana anautaka ni kuufanya mwili wote ufae kuwa hekalu kwa ajili ya ukaaji ndani wa Roho Mtakatifu. Mungu hatakubali chochote pungufu ya huduma ya mwanadamu katika ukamilifu wake. Haitoshi kuweka katika vitendo sehemu za mashine ya mwili ulio hai. Sehemu zote lazima zifanye kazi katika uwiano mkamilifu, vinginevyo huduma itakuwa na kasoro. Hivyo ndivyo mwanadamu anavyostahilishwa kushirikiana na Mungu katika kumwasilisha Kristo kwa ulimwengu. Hivyo ndivyo Mungu anavyotamani kuwaandaa watu kusimama mbele Zake wakiwa safi na watakatifu, ili aweze kuwatambulisha katika jamii ya malaika wa mbinguni.

Tumekabidhiwa ujumbe muhimu zaidi kuwahi kutolewa kwa ulimwengu wetu na picha inayopaswa kuwekwa dhahiri na wazi kabisa akilini mwetu ni utukufu wa Mungu. Hebu na tuwe waangalifu kwamba tusifanye kitu chochote ambacho kitadhoofisha afya ya kimwili, kiakili na kiroho, kwa maana Mungu hatapokea dhabihu yenye doa, inayougua na iliyo najisi. Uangalifu lazima uwekwe katika ulaji, unywaji, uvaaji na katika utendaji kazi, tusije tukapungua kwenye ufanisi wetu na kushindwa kufanya kazi yetu iliyotukuka zaidi katika namna nzuri, ili kwamba matokeo ya taabu yetu yaweze kudumu hata milele.

Ni wajibu wetu kuufundisha na kuufunza mwili nidhamu ili kwamba tuweze kutoa kwa Bwana wetu huduma ya juu zaidi iwezekanavyo. Mazoea yasitutawale. Hatupaswi kuubembeleza uchu wa chakula na kujiingiza katika matumizi ya kile ambacho si kwa faida yetu, kwa sababu tu ya kukidhi ladha; wala tusitafute kuishi kwa mpango wa kujinyima chakula, kwa wazo kwamba tutakuwa tukiwaza mambo ya kiroho na kwamba Mungu atatukuzwa. Tunalazimika kutumia akili ambayo Mungu ametupatia ili kwamba tuweze kuwa wakamilifu katika mwili, nafsi na roho, ili tuweze kuwa na tabia linganifu, akili yenye uwiano mzuri na kufanya kazi kamilifu kwa ajili ya Bwana.